

KEWUJUDAN HADIS ISYARAT DALAM *SUNAN AL-TIRMIDHĪ* (The Existence of Indicative Hadis in *Sunan al-Tirmidhī*)

¹ MOHAMMAD FATTAH*
² LATIFAH ABDUL MAJID
² AHAMAD ASMADI BIN SAKAT

¹ Institut Dirosat Islamiyah al-Amien (IDIA), Prenduan, Sumenep, Madura, Jatim, Indonesia, 69465

² Jabatan Pengajian al-Quran dan al-Sunnah, Fakulti Pengajian Islam, Universiti Kebangsaan Malaysia, 43600 UKM Bangi, Selangor, Malaysia

ABSTRAK

Kepakaran Imam al-Tirmidhī dalam mengumpul hadis Nabi SAW terserlah apabila beliau menggunakan perkataan *wa fi al-bāb* (dalam tajuk ini terdapat riwayat) bagi perawi daripada kalangan sahabat. Hadis-hadis yang diisyaratkan ini tidak banyak mendapat perhatian para ulama terutama mengenai fungsi dan manfaatnya bagi mengukuh hadis yang disebut secara jelas dalam satu bab. Kajian ini bertujuan untuk mendedahkan kewujudan hadis-hadis isyarat tersebut dalam pelbagai kitab hadis terutama dalam *al-Kutub al-Sittah* dan menentukan fungsinya samada sebagai *mutābi* atau *shāhid*. Metode yang digunapakai dalam kajian ini adalah kajian kepustakaan yang memfokuskan kepada analisis dokumen menerusi kaedah *takhrīj tafṣīlī* yang mengambil sampel bab puasa dalam *Sunan al-Tirmidhī*. Kajian mendapati bahawa dalam perbincangan mengenai bab berkenaan terdapat empat puluh enam (46) sub bab yang mengandungi hadis isyarat. Di dalamnya terdapat seratus tujuh puluh lapan (178) hadis yang diisyaratkan oleh beliau. Dari empat puluh enam bab itu, terdapat tiga puluh lima (35) bab memiliki hadis-hadis isyarat dengan status *ṣaḥīḥ*, satu (1) bab dengan status *ḥasan*, dua (2) bab sebagai hadis *ḥasan gharīb* dan lapan (8) bab dengan status *ḍaʿīf*. Sememangnya dalam kitab *Sunan al-Tirmidhī* terdapat hadis-hadis yang diisyarat, malahan jumlahnya hampir menyamai bilangan hadis *al-Musarrah* (hadis yang diletakkan di dalam setiap sub bab berserta sanad dan matan). Perkara ini menunjukkan bahawa Imam al-Tirmidhī memberikan peluang kepada

*Corresponding author: Mohammad Fattah, Institut Dirosat Islamiyah al-Amien (IDIA), Prenduan, Sumenep, Madura, Jatim, Indonesia, 69465, mel-e: fattah1973.mjf@gmail.com.

Diserahkan: 23Disember 2015

Diterima: 18 Februari 2016

DOI: <http://dx.doi.org/10.17576/JH-2016-0802-08>

umat Islam dari kalangan ulama, pelajar dan orang awam (pembaca kitabnya) untuk menerokai khazanah *Sunnah Rasulullah SAW* dan mengukuhkan lagi fungsi hadis isyarat sebagai *mutaba'at*.

Kata kunci: al-Tirmidhī; Hadis Isyarat; *Sunan al-Tirmidhī*; *Mutāba'āt*; *Shawāhid*

ABSTRACT

The expertise of al-Tirmidhī in collecting the Prophetic tradition has been proven when he used the term wa fi al-bāb (in this topic there is hadis) according to narrators among the companions. However, these indicative hadis were failed to receive adequate attention of the scholars and primarily about its functions and benefits to strengthening any hadis which explicitly mentioned in the chapter. Therefore this study aims to reveal the existence of indicative hadis by al-Tirmidhī in various books of hadis to determine its function. The study found in the chapter on al-sawm (fasting), there are forty-six (46) sub chapters which contain (178) indicative hadis, and the values are; thirty-five (35) sub chapters had ṣahīḥ (sound), one (1) had ḥasan (good), two (2) had ḥasan gharīb (good and scarce), and eight (8) sub chapters in ḍa'īf status (weak). The study also found the existence of indicative hadis in Sunan al-Tirmidhī serve as mutaba'āt (parrallelism), and shawahid (witnesses). Hence, the implications of this study shows that those indicative hadis in the book of Sunan al-Tirmidhī are deemed utilizable as most of them are having the status of acceptable (maqbul). This study contribute significantly in the future exploration of the numerous indicative hadis found in other chapters as they are deemed as important evidence in the execution of the Islamic law who serves as mutaba'at.

Keywords: al-Tirmidhī; Indicative hadith; *Sunan al-Tirmidhī*; *Mutāba'āt*; *Shawāhid*

PENDAHULUAN

Allah SWT menurunkan al-Quran dan mengutus Baginda Rasulullah SAW untuk memberikan penjelasan bagi hukum-hakam syariat Islam bahkan mengangkat para ulama untuk meneruskan tugas suci ini. Para ulama mempunyai cara dan kaedah tersendiri dalam melakukan *istinbat* hukum tersebut, kerana mereka mempunyai kepakaran dan kemampuan untuk melakukannya. Antara para ulama tersebut ialah Imam al-Tirmidhī yang telah mengarang kitab *Sunan al-Tirmidhī* dengan metodologi ringkas yang tidak dilakukan oleh ulama lain. Salah satu metode beliau ialah membiasakan diri untuk menjelaskan hukum sesebuah hadis dari aspek *ṣahīḥ*, *ḥasan* dan *ḍa'īf*, bahkan beliau memberikan penjelasan secara terperinci mengenai unsur kelemahan *ḍa'īf* sesebuah hadis untuk memberikan

ruang pengetahuan kepada orang lain bahawa hadis tersebut dapat diamal ataupun tidak dapat diamal (al-Mubārakfūrī 1990).

Imam al-Tirmidhī menambahkan beberapa hadis yang berhubungkait dengan tajuk bab menggunakan metode ‘isyarat’. Contoh, *Wa fī al-Bāb ‘an Fulān wa Fulān*. Hadis ini mempunyai sumber daripada para sahabat samada ianya berfungsi sebagai *shawāhid* atau *mutāba‘at* bagi hadis yang telah disebutkan di dalam sesebuah bab. Sebagai contoh dalam kitab puasa bab Keistimewaan bulan Ramadan iaitu hadis yang disebutkan secara jelas dalam bab ini diriwayatkan daripada Abu Hurayrah dengan status hadis sebagai hadis *gharīb*. Kemudian beliau mengisyratkan bahawa dalam bab ini terdapat hadis yang diriwayatkan daripada Abd al-Raḥmān bin ‘Auf, Ibn Mas‘ūd dan Salmān (*wa fī al-bāb ‘an Abd al-Raḥmān bin ‘Auf, Ibn Mas‘ūd wa Salmān*) (al-Tirmidhī 1999).

Metodologi dalam menggunakan hadis isyarat ini adalah untuk membandingkan kekukuhan sanad atau *turūq* yang pelbagai antara perawi yang satu dengan yang lainnya. Kepelbagaian sanad ini dapat membentuk suatu dalil yang kukuh dan tidak diragui lagi untuk kegunaannya. Justeru, Imam al-Tirmidhī hendak menzahirkan aspek toleransi di kalangan para ulama hadis lebih-lebih lagi dalam perihal periwayatan sesebuah hadis. Imam al-Tirmidhī menjadi pelopor bagi mengetengahkan metode yang pelbagai dalam pengumpulan hadis di samping penggunaan istilah seperti hadis *hasan* dalam menentukan status hadis kerana sebelumnya hanya berlegar dalam kalangan ulama hadis istilah seperti hadis *ṣaḥīḥ* dan hadis *da‘īf* sahaja. Walhasil, kesemuanya adalah kerana kebijakan Imam al-Tirmidhī dalam memilih satu metode sebuah penulisan dengan meletakkan isyarat untuk memberikan peluang kepada khalayak dan umat Islam agar tidak merujuk kepada satu kitab rujukan sahaja dalam menentukan hujah-hujah mengenai kehidupan seharian mereka (Moḥammad Fattāḥ 2008).

MAKSUD HADIS ISYARAT

Sepanjang kajian dijalankan tiada takrif khas ke atas hadis Isyarat disebabkan kalimat tersebut merujuk kepada kenyataan Imam al-Tirmidhī dalam beberapa tajuk bab berkenaan *wa fī al-bāb ‘an fulān wa fulān* iaitu mengisyratkan kewujudan hadis yang bersumber daripada sahabat Nabi SAW daripada Baginda SAW Namun dapat dinyatakan bahawa maksud beliau dengan kenyataannya itu ialah bahawa keseluruhan hadis yang dikemukakan menerusi isyarat adalah layak disebut di bawah tajuk bab, samada berkaitan dengan lafaz hadis yang diriwayatkan atau sebahagian sahaja daripada permasalahan dan hadis tersebut menyokong hadis bab itu. Para ulama termasuk Imam al-Suyūṭī dan al-Mubārakfūrī sedia menyatakan bahawa kenyataan Imam al-Tirmidhī tersebut merupakan isyarat ke atas hadis-hadis yang diriwayatkan oleh para perawi hadis menerusi sahabat Rasulullah SAW hadis-hadis

yang diisyarat itu dapat dijumpai dalam kitab *Sunan al-Tirmidhī* sendiri atau di dalam kitab-kitab hadis yang lain (al-Qāsimī 1979).

USAHA ULAMA DALAM MENYINGKAP HADIS ISYARAT

Satu-satunya metode yang digunakan untuk mengetahui kewujudan hadis-hadis yang diisyaratkan oleh Imam al-Tirmidhī ialah dengan mentakhrīj hadis berkenaan. Usaha telah dimulakan oleh al-Mubārakfūrī di dalam kitabnya *Tuhfat al-Aḥwadhī bi Sharah Jāmi' al-Tirmidhī*. Kitab ini pula menjadi tumpuan dan rujukan para ulama dan penuntut ilmu kerana dapat menyingkap pelbagai permasalahan yang terdapat di dalam kitab *Sunan al-Tirmidhī*. Namun hadis isyarat hanya *ditakhrīj* sekadar kemampuan. Mengapa demikian, sebab di dalam *mentakhrīj* hadis isyarat ini, beliau mempunyai metodologi yang ringkas dengan sekadar menyebut perawi yang *mentakhrīj* hadis tersebut dan meletakkan matan hadis yang berbeza dengan hadis bab. Jika tidak didapati sesiapa yang *mentakhrījnya*, beliau akan berkata: Saya tidak menjumpainya (*lam aqif 'alā ḥadīthihi*) atau hendaklah dilihat sesiapa yang mentakhrījnya (al-Mubārakfūrī 1990). Selanjutnya Syekh al-Albānī dalam kitab *Ṣaḥīḥ al-Tirmidhī* dan *Da'īf al-Tirmidhī*, kedua-dua kitab ini telah menjadi panduan ramai para ulama hadis dan pelajar dalam menentukan kedudukan hadis di dalam kitab *Sunan al-Tirmidhī*. Namun dengan pengakuan yang jujur beliau berkata di dalam mukaddimah kitab *Da'īf al-Tirmidhī*: “Saya tidak berkesempatan *mentakhrīj* hadis yang diisrayatkan oleh Imam al-Tirmidhī” (al-Albānī 1998). Seterusnya Habibullah Mukhtar secara khusus mentakhrīj hadis-hadis isyarat dalam kitab *Sunan al-Tirmidhī*. Kajian beliau terhadap kepada *mentakhrīj* hadis isyarat sahaja tanpa menjelaskan hukum dan kedudukan hadis tersebut apatah lagi kesan kewujudannya terhadap hadis dalam tajuk bab sebagai *shawāhid* atau peranannya menjadi panduan hukum bagi isu-isu semasa (Mohammad Habibullāh Mukhtār 1996). Usaha terkini yang dilakukan untuk menyingkap hadis isyarat ini telah dilakukan oleh pengkaji menerusi kajian ilmiah sebagai disertasi master di Jabatan al-Quran dan al-Sunah Fakulti Pengajian Islam Universiti Kebangsaan Malaysia berkenaan dengan Bab Puasa. Oleh yang demikian, hasil kajian ini akan dapat mengenal pasti lebih banyak lagi kewujudan hadis isyarat.

TEKNIK PENGGUNAAN HADIS ISYARAT OLEH IMAM AL-TIRMIDHĪ

Beberapa teknik telah digunapakai oleh Imam al-Tirmidhī dalam mengumpul hadis Nabi SAW di dalam kitabnya sebagaimana dihuraikan dalam pendahuluan sebelum ini. Kewujudan hadis isyarat dikenalpasti ketika Imam al-Tirmidhī memilih dan mengemukakan hadis *ṣaḥīḥ* dan *masyhūr* untuk dijadikan sebagai hukum dalam permasalahan bab tertentu. Kemudian beliau mengisyaratkan kewujudan permasalahan

bab ini menerusi pelbagai hadis dengan kenyataannya: *wa fi al-bab an fulan wa fulan*. Seterusnya, Imam al-Tirmidhī sengaja tidak menyebut hadis *masyhūr* yang bersumber daripada sahabat Nabi SAW, sedangkan sanad hadis yang sampai kepadanya adalah *ṣaḥīḥ*. Beliau tidak mengeluarkannya kerana hadis tersebut dianggap masyhur dan dikenali *keṣaḥīḥannya*. Sebagai contoh, Rasulullah SAW bersabda: “Ajarkanlah anak-anak kamu tentang cara solat sekiranya mereka telah berumur tujuh tahun dan pukullah mereka jika pada usia sepuluh tahun (dia tidak menunaikannya kewajiban solat itu)”. Diriwayatkan oleh Imam al-Tirmidhī dalam kitab solat bab menyatakan bilakah kanak-kanak itu diperintahkan untuk menunaikan solat. Beliau juga berkata: *wa fi al-bab ‘an Abdillāh ibn Amr*. Hadis ini bertaraf *ḥasan li dhātih* kerana perawinya ‘Abdul Mālik bin al-Rabī berada pada tahap *ḥasan*. Hadis ini naik taraf kepada *ṣaḥīḥ li ghayrih* dengan hadis *shāhid* berikut yang juga bertaraf *ḥasan li dhātih* kerana perawinya Sawwar Abū Hamzah al-Sayrafīy berada pada tahap *ḥasan* (al-Murtada 1994). Dalam keadaan ini Imam al-Tirmidhī menghuraikan hukum fekah dalam bab tersebut daripada hadis sahabat Nabi SAW yang lain dan tidak disebut oleh mana-mana pengarang kitab *ṣaḥīḥ* berhubung hadisnya. Sanad yang disebut kedua ini tidak seperti sanad hadis yang pertama, namun martabatnya masih dihukum *ṣaḥīḥ*. Kemudian menyusulnya dengan teknik menggunakan isyarat kepada hadis-hadis dalam bab itu. Imam al-Tirmidhī juga mengemukakan dalam bab tertentu hadis yang berstatus *ḍa‘īf* atau yang kurang martabatnya dari darjat *ṣaḥīḥ* sedangkan disana terdapat hadis yang *ṣaḥīḥ*. Menurut kebiasaannya, hadis *ṣaḥīḥ* tersebut dikemukakan menerusi isyarat (al-Murtada 1994). Dapat disimpulkan bahawa metode mengemukakan hadis *ḍa‘īf* atau lebih lemah dalam bab-bab tertentu, tidak menjatuhkan *kethiqahan* Imam al-Tirmidhī sebagai ilmuan terbilang, kerana di sana terdapat hadis *ṣaḥīḥ* yang beliau kemukakan walaupun hanya secara isyarat (Ahamad Asmadi 2007).

FUNGSI DAN KEDUDUKAN HADIS-HADIS ISYARAT DALAM KITAB *SUNAN AL-TIRMIDHĪ*

Hadis-hadis yang diisyaratkan oleh Imam al-Tirmidhī adalah berfungsi sebagai *shawahid* dan *mutaba‘āt* bagi hadis yang disebut secara jelas. *Shawahid* ialah seorang periwayat menyertai periwayat lain dalam periwayatan hadis daripada *ṣahabiy* yang lain samada dari sudut lafaz atau erti. *Mutaba‘āt* pula ialah seorang periwayat menyertai periwayat lain dalam periwayatan hadis daripada *ṣahabiy* yang sama dari sudut lafaz atau erti (Nur al-Din ‘Itr 1997; al-Qudah 2003; Syed ‘Abdul Majid Ghouri 2012).

Mutaba‘āt terbahagi dua iaitu pertama, *mutaba‘ah tāmmah*: Penyertaan itu bermula daripada peringkat syeikhnya sehinggalah ke penghujung sanad. Kedua, *mutaba‘ah qasīrah*: Penyertaan itu bermula daripada peringkat selepas syeikhnya sehinggalah ke penghujung sanad (al-Qudah 2003).

Para ulama telah menggariskan pelbagai dasar dan garis panduan yang teliti dan mendalam ketika menilai sesuatu hadis. Antara lain, mereka menekankan pengumpulan jalur-jalur hadis supaya dikaji khususnya dari sudut penelitian sanad. Hadis tidak boleh dihukum *ṣaḥīḥ* atau *ḍa'īf* hanya dengan melihat satu jalur sahaja. Kemungkinan jalur sesuatu hadis itu *ḍa'īf*, akan tetapi apabila ada jalur lain yang menguatkannya, maka hadis pertama itu bertukar kepada *hasan li ghayrah*. Hadis *hasan li dhātih* juga dapat dinaik tarafkan kepada *ṣaḥīḥ li ghayrih* dengan *shawāhid* dan *mutābaāt* (al-'Asqalani t.th)


HASIL KAJIAN

Berdasarkan jumlah peratus hadis Isyarat riwayat Imam al-Tirmidhī dalam kitab hadis ialah *Ṣaḥīḥ al-Bukhārī* karangan Imam al-Bukhari sebanyak 32%, *Ṣaḥīḥ Muslim* karangan Imam Muslim sebanyak 45%, *Sunan Abi Dāwūd* karangan Imam Abū Dāwūd sebanyak 28%, *Sunan al-Tirmidhī* karangan Imam al-Tirmidhī sebanyak 3%, *Sunan al-Nasā'i* karangan Imam al-Nasā'i sebanyak 46%, *Sunan Ibn Mājah* karangan Imam Ibn Majah sebanyak 27%, *Musnad Aḥmad bin Ḥanbal* karangan Imam Aḥmad bin Ḥanbal sebanyak 65%, *Sunan al-Dārimī* karangan Imam al-Dārimī sebanyak 4%, kitab 'al-Sunan al-Kubra' karangan Imam al-Bayhaqī sebanyak 12%, *Shu'ab al-Īmān* karangan Imam al-Bayhaqī sebanyak 4%, *Ṣaḥīḥ Ibn Khuzaymah* karangan Ibn Khuzaymah sebanyak 20%, *Ṣaḥīḥ Ibn Ḥibbān* karangan Ibn Hibban sebanyak 15%, *Musnad al-Bazzār* karangan al-Bazzar sebanyak 3%, *Sunan al-Dāraquṭnī* karangan al-Dāraquṭnī sebanyak 10%, *al-Mustadrak alā al-Ṣaḥīḥayn* karangan al-Ḥākim sebanyak 3%, *al-Mujam al-Kabīr* karangan al-Ṭabrānī sebanyak 29 hadis, *al-Mujam al-Awsaṭ* karangan al-Ṭabrānī sebanyak 12%, *al-Mujam al-Saḥīr* karangan al-Ṭabrānī sebanyak 2%, *Musnad 'Abd al-Razzāq* karangan 'Abd al-Razzāq sebanyak 3%, *Sharah Ma'anī al-Athār* karangan al-Ṭahāwī sebanyak 13%, *al-Ḍu'afā al-Kabīr* karangan al-'Uqaylī sebanyak 2%, *al-Istidhkār* karangan Ibn 'Abd al-Bār sebanyak 2%, *Musnad 'Abd bin Ḥamīd* karangan 'Abd bin Ḥamīd sebanyak 2%, *Musnad al-Ṭayālīsī* karangan al-Ṭayālīsī sebanyak 4% dan *Musnad Abī Ya'lā* karangan Abū Ya'lā sebanyak 5%. Jadual berikut menunjukkan peratus hadis dalam kitab tersebut.

Jadual 1 adalah berkaitan ulama hadis yang mengeluarkan hadis yang sama dan disebutkan secara jelas *al-Musarrah* oleh Imam al-Tirmidhī dalam satu tajuk bab. Ianya menunjukkan kekerapan kewujudan persamaan tersebut. Peratusan kesamaan itu terdapat dalam kitab *Ṣaḥīḥ al-Bukhārī* karangan Imam al-Bukhārī sebanyak 22%, *Ṣaḥīḥ Muslim* karangan Imam Muslim sebanyak 26%, *Sunan Abi Dāwūd* karangan Imam Abu Dāwūd sebanyak 25%, *Sunan al-Nāsa'i* karangan Imam al-Nasā'i sebanyak 22%, *Sunan Ibn Mājah* karangan Imam Ibn Mājāh sebanyak 22%, *Musnad Aḥmad bin Ḥanbal* karangan Imam Aḥmad bin Ḥanbal sebanyak 21%, *Sunan al-Dārimī* karangan Imam al-Dārimī sebanyak 1%, *al-Sunan al-Kubrā* karangan Imam al-Bayhāqī

sebanyak 1%, *Shu'ab al-Īmān* karangan Imam al-Bayhaqī sebanyak 1%, *Ṣaḥīḥ Ibn Khuzaymah* karangan Ibn Khuzaymah sebanyak 4%, *Ṣaḥīḥ Ibn Ḥibbān* karangan Ibn Ḥibbān sebanyak 5%, *Muṣannaḥ Ibn Abī Shaybah* karangan Ibn Shaybah sebanyak 1%, *Musnad al-Bazzār* karangan al-Bazzār sebanyak 1% dan Sunan al-Dāraqutnī karangan al-Dāraqutnī sebanyak 2%.


JADUAL 1 Para Ulama Hadis yang Mentakhrij Hadis-Hadis yang Disebut Secara Jelas



Sumber: Analisis dapatan kajian tesis master 2008

Jadual 2 menunjukkan status dan kedudukan bagi hadis yang diisyaratkan oleh imam al-Tirmidhī samada *ṣaḥīḥ*, *ḥasan*, *gharīb*, *ḥasan gharīb* dan *da'īf*. Bagi hadis yang berstatus *ṣaḥīḥ* sebanyak 24%, hadis yang berstatus *ḥasan* pula sebanyak 14%, hadis yang berstatus *gharīb* sebanyak 14.5%, hadis yang berstatus *ḥasan gharīb* sebanyak 7% manakala hadis yang berstatus *da'īf* sebanyak 6%. Berdasarkan dapatan ini boleh diru,uskan bahawa hadis yang boleh digunakan (ma'mūlun bihi) mencapai 59.5%.

JADUAL 2 Kedudukan Hadis Isyarat (*al-Aḥādīth al-Musyār ilayhā*)



Sumber: Analisis dapatan kajian tesis master 2008

Kedudukan atau status hadis isyarat tersebut dari aspek *ṣaḥīḥ*, *ḥasan* dan *ḍa'īf*, terserlah dalam bab puasa dengan dapatan sebagaimana berikut, hadis yang diisyaratkan terdapat dalam 48 tajuk bab dari 83 tajuk bab yang sedia ada dalam bab puasa. Hadis isyarat tersebut berjumlah 178 hadis. Hadis-hadis yang berkedudukan sebagai hadis *ṣaḥīḥ* terdapat dalam 35 tajuk bab, hadis *ḥasan* terdapat dalam 1 tajuk bab, manakala hadis *ḥasan gharīb* terdapat dalam 2 tajuk bab dan hadis *ḍa'īf* terdapat dalam 8 tajuk bab.

KESIMPULAN

Selepas menerokai khazanah kitab *Sunan al-Tirmidhī*, kajian menyimpulkan bahawa ulama hadis mempunyai metode penulisan yang berbeza antara satu sama lain. Unsur meniru dan *mentaqlid* karya orang lain jarang dijumpai. Justeru, metode penulisan Imam al-Tirmidhī dalam kitabnya dapat membentuk persepsi bahawa kitab beliau berfungsi sebagai kitab fekah perbandingan (*fiqh muqarin*) dan kitab *'ilal* (kitab yang menghuraikan pelbagai kecatatan yang dijumpai dalam sesebuah hadis). Selebihnya didapati bahawa kitab beliau menyimpan khazanah hadis Nabi SAW yang sangat banyak dengan metode yang ringkas. Perkara ini wujud selepas membuat perbandingan dengan kewujudannya dalam pelbagai kitab hadis yang lain. Maka sudah sepatutnya jika Imam al-Tirmidhī sendiri memberikan kenyataan dalam mukaddimah kitab *Sunan al-Tirmidhī*: “Sesiapa yang di rumahnya terdapat kitab sunan ini, seolah-olah Baginda SAW sedang bersabda, berwasiat dan berkata-kata di dalamnya” (al-Tirmidhī 1999).

RUJUKAN

- 'Abd al-Razzāk, Abū Bakār 'Abd al-Razzāq ibn Hammām. 1403. *Muṣannaḥ 'Abd al-Razzāk*. Taḥqīq. Ḥabīb al-Raḥmān al-A'ẓami. Beirut: al-Maktab al-Islami.
- Abū Dāwūd, Sulaymān bin al-Ath'ash Abū Dāwūd al-Sajastānī al-Azdī. 1999. *Sunan Abī Dāwūd*. Kaheerah: Dār al-Ḥadīth.
- Abū Ya'lā, Aḥmad ibn 'Alī ibn al-Muthannā. 1984. *Musnad Abī Ya'lā*. Taḥqīq. Husayn Salīm Asad. Damsyik: Dār al-Ma'mūn lī al-Turath.
- Ahamad Asmadi bin Sakat. 2007. *Metodologi Imam al-Tirmidhī dalam Kitab al-Jāmi'*. Batu Caves: Pustaka Haji Abdul Majid Sdn Bhd.
- Aḥmad ibn Ḥanbal. t.th. *Musnad Aḥmad ibn Ḥanbal*. Taḥqīq. Shu'ayb al-Arnāwūt. Kaheerah: Mu'assasat Qurḍubah.

- al-Albānī, Naṣr al-Dīn. 1998. *Ṣaḥīḥ al-Tirmidhī*. Riyad: Maktabat al-Tarbiyah al-'Arabī li al-Duwal al-Khalīj.
- al-Bayhaqī, Abū Bakār Aḥmad ibn al-Ḥusayn ibn 'Alī ibn Mūsā. 1994. *Sunan al-Bayhaqī al-Kubrā*. Taḥqīq: Mohammad 'Abd al-Qadir 'Ata. Makkah al-Mukarramah: Maktabat Dar al-Baz.
- al-Bayhaqī, Abū Bakār Aḥmad ibn al-Ḥusayn ibn 'Alī ibn Mūsā. 1410H. *Shu'ab al-Īmān*. Taḥqīq. Muḥammad al-Sa'īd Basyunī Zaghlūl. Beirut: Dār al-Kutub al-'Ilmiyyah.
- al-Bazzār, Abū Bakār Aḥmad ibn 'Amr. 1988. *Musnad al-Bazzār*. al-Madīnah al-Munawwarah: Maktabat al-'Ulum wa al-Ḥikam.
- al-Bukhārī, Muḥammad bin Īsmā'īl Abū Abd Allāh al-Bukhārī al-Ju'fī. 1987. *Ṣaḥīḥ al-Bukhārī*. Beirut: Dār Ībn Kathīr.
- al-Dāraquṭnī, Abū al-Ḥasan 'Alī ibn 'Umar ibn Aḥmad. 1988. *Sunan al-Dāraquṭni*. Taḥqīq. al-Sayyid 'Abd Allāh Hāshim Yamānī al-Madanī. Beirut: Dār al-Fikr.
- al-Dārimī, Abd 'Allāh ibn Abd al-Raḥmān ibn al-Faḍl ibn Bahram. 1988. *Sunan al-Dārimī*. Taḥqīq. Fawwaz Aḥmad Zamrali & Khālid al-Sab'a al-'Ilmī. Beirut: Dār al-Fikr.
- al-Dimyātī, al-Sayyid al-Bakr bin al-Sayyid Muhammad Shata. t.th. *Hashiyah Iānah al-Ṭalibīn ala Ḥallī al-Fadī Fath al-Mu'īn*. Beirut: Dār al-Fikr.
- al-Ḥākīm, Muḥammad ibn 'Abd Allāh. 2000. *al-Mustadrak 'alā al-Ṣaḥīḥayn*. Taḥqīq. Muṣṭafā 'Abd al-Qādir 'Atā. Beirut: Dār al-Fikr.
- Ibn 'Abd al-Bar, Yūsuf ibn 'Abd Allāh. 2000. *al-Istidhkar*. Beirut: Dār al-Kutub al-'Ilmiyyah.
- Ibn Abī Shaybah, Abū Bakr Abd Allāh ibn Muḥammad. 1409. *al-Musannaḥ fi al-Aḥādīth wa al-Athār*. Taḥqīq. Kamal Yūsuf al-Hūt. Riyad: Maktabat al-Rushd.
- Ibn Khuzaymah, Muḥammad ibn Ishāq ibn Khuzaymah. 1970. *Ṣaḥīḥ Ibn Khuzaymah*. Taḥqīq. Muḥammad Muṣṭafa al-'Aẓami. Beirut: al-Maktab al-Islamī.
- Ibn Mājah, Muḥammad bin Yazīd Abū Abd Allāh al-Qazwīnī. 1999. *Sunan Ibn Mājah*. Kaherah: Dār al-Hadīth.
- Mālik bin Anas, Abū Abd Allāh al-Asbaḥī. t.th. *Muwatta' al-Imam Mālik*. Mesir: Dār Ihyā' al-Turāth al-'Arabī.

- Moḥammad Fattaḥ. 2008. *Kashf al-Lithām 'Ammā Ashara Ilayhi al-Tirmidhī fī Sunanihi min al-Kalām; Takhrīj Aḥādīth al-Isyārah "Wa fī al-Bab" fī Kitāb al-Saum*. Bangi: Universiti Kebangsaan Malaysia.
- Muḥammad Habībullah Mukhtār. 1996. *Kashf al-Niqāb 'Amma Yaqūluhu al-Tirmidhī wa fī al-Bāb*. Karachi: al-Maktabat al-Yushfiyyah Dār al-Taṣnīf.
- al-Mubārakfūrī. Abū al-'Ilā Muḥammad 'Abd al-Raḥmān bin 'Abd al-Raḥīm. 1990. *Tuḥfat al-Aḥwadhī bi Sharḥ Sunan al-Tirmidhī*. Beirut: Dār al-Kutub al-'Ilmiyyah.
- al-Murtaḍā al-Zayn Aḥmad. 1994. *Manāḥij al-Muḥaddithīn fī Taqwīyah al-Aḥādīth al-Ḥasanah wa al-Ḍa'īfah*. Riyad: Maktabah al-Rushd.
- Muslim bin al-Hajjāj Abū al-Ḥusayn al-Qusayrī al-Naysābūrī. 1997. *Ṣaḥīḥ Muslim*. Kaherah: Dār al-Ḥadīth.
- al-Nasā'ī. Abū Abd al-Raḥmān Aḥmad bin Shu'ayb. 1986. *al-Muḥtabā Min al-Sunan*. Aleppo: Maktab al-Maṭbu'ah al-Islamiyyah.
- 'Itr, Nūr al-Dīn. 1988. *al-Imam al-Tirmidhī wa al-Muwazanah Bayna Jami'ihī wa Bayna al-Ṣaḥīḥayn*. Beirut: Muassasat al-Risālah.
- al-Qāsimī, Muḥammad Jamāl al-Dīn. 1979. *Qawā'id al-Taḥdīth min Funūn Muṣṭalah al-Ḥadīth*. Beirut: Dār al-Kutub al-'Ilmiyyah.
- al-Qudah, Sharaf Mahmūd. 2003. *al-Minhāj al-Ḥadīth fī Muṣṭalah al-Ḥadīth*. Kuala Lumpur: Albayan Corporation Sdn. Bhd.
- al-Suyūṭī, Jalāl al-Dīn Ibn 'Abd Raḥmān ibn Abū Bakr. t.th. *Tadrīb al-Rāwī fī Sharḥ Taqrīb al-Nawawī*. Riyad: Maktabah al-Riyād al-Ḥadīthiyyah.
- Syed 'Abdul Majid Ghouri. 2012. *Pengenalan Ilmu Mustalah al-Hadith*. Terj. Muhammad Hazim bin Hussin. Bangi: Dar al-Shakir.
- al-Ṭabrānī, Sulaymān ibn Aḥmad ibn Ayyūb Abū al-Qāsim. 1983. *al-Mu'jam al-Kabīr*. Taḥqīq. Hamdi ibn 'Abd al-Majīd al-Salafī. Aleppo: Maktabat al-'Ulum wa al-Ḥikam.
- al-Ṭabrānī, Sulaymān ibn Aḥmad ibn Ayyūb Abū al-Qāsim. 1415H. *al-Mu'jam al-Awsaṭ*. Taḥqīq Ṭariq ibn 'Iwād Allāh & 'Abd al-Muḥṣin ibn Ibrāhīm al-Ḥusaynī. Aleppo: Maktabat al-'Ulum wa al-Hikam.
- al-Ṭabrānī, Sulaymān ibn Aḥmad ibn Ayyūb Abū al-Qāsim. 1415H. *al-Mu'jam al-Ṣaghīr*. Taḥqīq Muḥammad Shakūr Mahmūd al-Ḥaj Amrīr. Aleppo: Maktabat al-'Ulūm wa al-Ḥikam.

al-Ṭayālīsī, Sulaymān ibn Abū Dāwūd al-Fārisī al-Baṣrī. t.th. *Musnad Abī Dāwūd al-Ṭayālīsī*. Beirut: Dār al-Ma'rifat.

al-Tirmidhī, Abū 'Īsā Muḥammad bin 'Isa bin Sawrah. 1999. *Sunan al-Tirmidhī*. Kaherah: Dār al-Ḥadīth.